

GENESE

TUSI A BÂN ANYI MOSE.

HNHYIMAKAN 1.

HABA hnyi can Khong ame op drany me hmeledrany. 2 Ke haba hmeledrany ame ba hwenöiny ke ba önyen; ke ka e menekholom hon dok ae dit: k' ame nap Hanon Khong hon je köiö. 3 Ke Khong ame ha, ka habe, Lany jut: k'ame lany dö. 4 Ke Khong ame wâ lany a ünyi ae so: ke Khong ame sihnyigöulen lany me menekholom. 5 Ke Khong ame hwenyi ien lany, me, Bong, ke e ame hwenyi ien menekholom, me, Hnyinghet. Ke e hu sahac me e hu hnyomakatu, wale bong a khaca.

6 Ke Khong ame ha, ka habe, E so e me hu ke bwang hnyi wanben je köiö, me me bi hnyigöulen je köiö ünyi hnyi ke je köiö. 7 Ke Khong ame ânyâ bwang, me sihnyigöulen je köiö eü hmelen bwang, ünyi hnyi je köiö ethö hon bwang: ke e but e. 8 Ke Khong ame hwenyi ien bwang, me, Drany. Ke e hu sahac me e hu hnyomakatu, wale ke bong a loiny.

9 Haba Khong ame ha, ka habe, E so adre me ûkhacaköüâ ta je köiö eü hmelen drany ka hnyi dok a khaca me me manen dut dok ae mada: ke e but e. 10 Ke Khong ame hwenyi ien dok ae mada, me, Kânâ; ke haba ta je köiö adre ûkhacaköüâ, e ame hwenyi ien, me, Köiö: haba Khong ame wâ a e so. 11 Haba Khong ame ha, ka habe, E so kânâ ame he ka okûâ hna önying, me üö ae ometu ame he ka hu önyen wan, me üö ae wa ame he ka hu wan, wale ae hu önyen hnyin, hoton bongon. 12 Ke haba kânâ ame okûâ thö hna önying, ke üö ae ometu ame hu önyen wan hoton bongon e, me üö ame wa ae hu önyen hnyin, hoton bongon; haba Khong ame wâ a e so. 13 Ke e hu sahac me e hu hnyomakatu, wale ke bong a kuniny.

14 Haba Khong ame ha, ka habe, E so he

ka hu ta je melam hnyi bwanginy drany ethö, me me bi hnyigöulen lany me lit; ke haba je ünyi e me hnân ta je haten, me ta je üen, me ta je bong, me ta je huna: 15 ke wale minya e, a hnân ta je melam hnyin bwanginy drany ethö he ka omelamâ hmeledrany: ke e but e. 16 Ke Khong ame ânyâ li melam a lo ae gan; haba melam ae gan hmâ, me hnân musö lany, ke haba melam ae ûhnyûkong hnân musö lit: k' ame ânyâ minya ta je okhû. 17 Haba Khong ame ip ta je ünyi e hnyi bwanginy drany ethö me me he ka omelamâ hmeledrany, 18 me he ka musö lany me lit, me he ka bi hnyigöuleny lany me lit: ke Khong ame wâ a e so. 19 Ke e hu sahac me e hu hnyomakatu, wale ke bong a vakiny.

20 Haba Khong ame ha, ka habe, E so ame he je köiö ka odedo ta je ünyi ame bwebwet ae hu möt, ke so ame gâ ethö hon kânâ je meno ame gâ, hnyi bwanginy drany ethö. 21 Ke Khong ame op je wâ ae gan hmâ, me ta je ünyi hia thithö ae möt ame bwebwet, waleji ame odedo hnen köiö, hoton je ve bongon, me ta je meno hia ae hu labenyin, hoton je bongon: ke Khong ame wâ a e so. 22 Ke Khong ame hahnahici ödra, haingen, ka habe, Si but, me dudu but, me ounöngütâ thö köiö, k' e so e me dudu but je meno ame gâ hnyi hmeledrany. 23 Ke e hu sahac me e hu hnyomakatu, wale ke bong a thabûnginy.

24 Haba Khong ame ha, ka habe, E so kânâ ame öduduâ ta je meno ame menâ, hoton je ve bongon, wale je meno a vak cadra, me ta je ünyi ame iyâü, me je menoiny hnyot, hoton je ve bongon: ke e but e. 25 Ke Khong ame ânyâ je menoiny hnyot, hoton je ve bongon e, me ta je meno a vak cadra, hoton ta je ve bongon, me ta je meno hia thithö adre me iyâü hon kânâ, hoton je ve bongon: ke Khong ame wâ a e so. 26 Ke haba Khong ame ha, ka habe, E so ate me

op at hnyi wi öta, me tha ücû m'öta: ke hamödra he ka musö ta je wâ eü hnyi köüö, me ta je meno ame gâ ethö, me ta je meno a vak cadra, me hmeledrany hia thithö, me ta je meno ame iyâü wale adre me iyâüâ hmeledrany. 27 Ke Khong ame op at ae we e bi, ame op e me we Khong; e ame up ödru бага me momo. 28 Ke Khong ame hahnahici ödru: ke haba Khong ame ha ködru, ka habe, Si but, me dudu but me ödedoâ hmeledrany, me hom ühnyükongo; me musö thö ta je wâ eü hnyi köüö, me ta je meno ame gâ ethö, me ta je ünyi hia ae möt ame iyâüâ hmeledrany. 29 Ke Khong ame ha, ka habe, Wâ bi, oge hia but ham köbu ta je üö hia ae ometu ae hu önyen hnyin, a hnyi hon hmeledrany hia thithö, me ta je üö hia ae wa me hu önyen hnyin; wale me hnân ö'bu: 30 Ke haba ta je üö ae ometu ae hat, me, wale hnân an ta je menoiny hnyot hia, me ta je meno hia ame gâ ethö, me ta je meno hia ame iyâüâ hmeledrany, a ta je ünyi ame menâ: ke e but e. 31 Ke Khong ame wâ ta je ünyi hia thithö e ame ânyâ, ke wâ bi, e so hmönyin. Ke e hu sahaç me e hu hnyomakatu, wale bong a siksiny.

HNYIMAKAN 2.

KE ame umo thö drany me hmeledrany me ta je ünyi hia thithö eü hnyin. 2 Ke haba hnyi bong a seveniny Khong ame oumo anyin ta je huliwa waleji e ame ânyâ. 3 Ke haba Khong ame hahnahici bong a seveniny, me okabâ e: anyin a e ame menâ hnyin, ünyi hnyi anyin ta je huliwa hia thithö waleji Khong ame op me ânyâ.

4 Walang je bongon ioiny drany me hmeledrany, waleji hnyi üen adre op li ünyi e, hnyi bong Iehova Khong ame ânyâ hmeledrany me drany. 5 Ke tiga ba hnyeuten hnyei hnyi kânâ, ke tiga ca kü thö khölakiny hnyei: anyin a Iehova Khong ame tiga ca ota we ka hnyi hon kânâ, ke tiga ba at he ka belökâ kânâ; 6 k' ame ölö thö hau ünyi hnyi kânâ me okhubetâ hia hon kânâ. 7 Ke haba Iehova Khong ame op at ge sesâiny kânâ, me menâ ka hnyi li hnyingöiny homenâiny möt; ke haba at ame wia me me hanu ae möt. 8 Ke Iehova Khong ame belökâ ke hnyei hnyi ke keihen Edena e deïö; k' ame ip eling at waleji a hia but op. 9 Ke Iehova Khong ame okûâ ünyi hnyi kânâ ta je üö hia thithö ae hmanenang at ka wâ, me so hnân han; me üöiny möt

minya hnyi wanben hnyei, me üöiny wâ-hmakhmeto so me kong. 10 Ke ame hingölö üheny hnyi Edena wagewe hnân he ka hû hnyei belök; k' ame vese but üheny e me me je vheiny a vak. 11 Haba ien at a bân, me, Pisona: wale at ame igigilö hia hnyei Havila, waleling ae hu gol; 12 ke so but goliny hnyei e: e minya eling bedola me veto soama. 13 Ke haba ien wagewe a loiny, me, Gihona: wale at ame igigilö hnyei Kuza. 14 Ke haba ien wagewe a kuniny, me, Hidekela: wale ame he deïö Asuria ai. Ke Euferate wagewe a vakiny. 15 Ke haba Iehova Khong ame hom at, me ip ju e hnyi hnyei Edena he ka belökâ me tuö. 16 Ke Iehova Khong ame hûna ka at, ka habe, U me he ka han monu ünyi hnyi ta je üö hia thithö hnyi hna belök: 17 ke haba üöiny wâhmakhmetoâ so me kong, me, u me ca he ka han ünyi hnyin: anyin a haba hnyi bong u me he ka han hnyin, e hnathu u me he ka mokuç.

18 Haba Iehova Khong ame ha, ka habe, E ca so e he ka hake laba at; oge me he ka ânyâ hobi kâu ke ühadruo ae ücü kâu. 19 Ke Iehova Khong ame op ünyi hnyi kânâ ta je menoiny hnyot hia, me ta je meno hia ame gâ ethö; me hum ödra ka at me me wâ ia ien e ame he ka hwenyi ödra: ke haba ien ta je meno ae möt hia ame hwenyi ödra at, wale ien bi. 20 Ke ame hwenyi ien ta je meno hia a vak can hnen at, me ta je meno ame gâ ethö, me ta je menoiny hnyot hia; ke adre tiga ca wâ hobi kâu at ke ühadruo ae ücü kâu. 21 Ke Iehova Khong ame kunâ mokut hnying ka hnyi hon at, me e ame mokut; me e ame hom but ke jeien hvaken, k' ame hlöng hmetu ju hwaban ge utiöiny: 22 ke haba jehvak wale Iehova Khong ame hia but hom ünyi ge at, me ame op me me momo but, me su thö e ka at. 23 Ke haingen at, ka habe, Walang jö hanen je jeïök, me utiö hanen vik: adre me he ka hwenyi ien, me, Momo, anyin adre hom ünyi ge бага. 24 Waleling me me he at ka hna kamen me hinyen, me keçe ka âân; k' ame he ka khaca thibi unyidru. 25 Ke ödru lo ödru me he thu, wale lia-mâian, k' ödru me ca hmehma bi.

HNYIMAKAN 3.

KE e khana he ka bibihwakecin hnen on, hon ta je menoiny hnyot hia, hnö Iehova Khong hna op. Haba e ame ha ka momo ka habe. Hawa, a um dö ha

Khong, ka habe, Öbu ma ca he ka han ünyi hnyi ta je üö hia thithö hnyi hnyeï? 2 Ke haingen momo ka on, ka habe, Adre hna köhmu he ka han wan ta je üö hnyi hnyeï: 3 ke so bi haba wan üö waleji hnyi wanben hnyeï, a hia but ha Khong, ka habe, Ca he öbu ka han wan, ke haba khaca, ca he öbu ka kâlâ, wâ öbu nye moku. 4 Ke haba on ame ha ka momo, ka habe, Öbu me ca he ka wen moku: 5 anyin ae khana Khong a haba hnyi bong öbu ma han hnyin, wale ame he ka metâ but li emaköbu, m' öbu me he ka helâ but me Khong, ka wâhmakhmeto so me kong. 6 Ke a wâ but momo üö, a e so hnân han, me hmanenang at ka wâ, me üö ae ünyi hnathu, me hnân ometâ at, me haba momo ame tau wan, me han; k' ame ham minya ka âiân a tha e mē, me e ame munyi han. 7 Me ame metâ but li emaködrü, me me khan' ödrü thö a ödrü me he thu; me ödrü me ütibetköü ta je lan meta, me hnân hnamejidru. 8 Ke ödrü me löng hwo Iehova Khong ame ngeno hnyeï, hnyi ke hnyi ban bong ae menyik: ke haba Adamu me âiân ödrü me lubaduöng ge hnyimakö Iehova Khong hnyi ta je üö hnyi hnyeï. 9 Ke Iehova Khong ame hawo Adamu, me ha, ka habe, U a? 10 Ke haingen, ka habe, Oge löng ut hwâm hnyi hnyeï, ke oge ot, anyin oge me he thu; me inya oge me lubaduöng. 11 Me e ame ha, ka habe, Ia thumetu u m' u me he thu? Hawa, u je hia but han ünyi hnyi üö waleji oge me hûna köu, a u ma ca he ka han? 12 Haingö Adamu, ka habe, Haba momo u je hna könya me me tha e mönya, e ame ham könya ünyi hnyi üö, me oge me hnyi han. 13 Haba Iehova Khong ame ha ka momo, ka habe, Ie ünyi ang u je ânyâ? Haingen momo, ka habe, hnen on hna iyawö nya, m' oge me han. 14 Ke Iehova Khong ame ha ka on, ka habe, u je hnaühangö but hon ta je meno a vak can hia thithö, me hon ta je menoiny hnyot hia thithö, anyin a u je ânyâ helâe; u ma he ka iyâü hnyekom, me an sesâiny kânâ hnyi ta je bong hia bonginy ânyâm möt: 15 ke oge me he ka oiwahnaïhmönyu u me momo, me mâtrânâm me mâtrâniny momo: e ame he ka kot bâm, ke u me he ka kot ohmâiny can. 16 Ke e ame ha ka momo, ka habe, Oge me he ka osehia ânyâm vec u ka erkin; u ma he ka hnokoâ hnyi vec; ke u me he ka wem bi hmelen âiâm, ke e ame he ka musu u. 17 Ke e ame ha kö Adamu, ka habe, Anyin a u je hia

but löng hoton hwan âiâm, me han ünyi hnyi üö waleji oge me nyibu u gan, me ha. ka habe, Ca he ka han ünyi hnyin; awe hnaühangö but kânâ ünyi gam; ke u ma he ka han ünyi hnyin hnyi vec hnyi ta je bonginy ânyâm möt hia; 18 k' ame he ka oküâ köu ta je üö ae üdedö me watetaföcö; ke u me he ka han je üö ae ometu hnyi ta hnyeï; 19 ke u me he ka han ünyi ge khuniny hnyimâkâm, ke ne o but üen u me he ka hmetu ka hnyi kânâ; anyin adre hum u ünyi hnyin e; anyin a u sesâiny kânâ, ke u me he ka hmetu hmetu ka knyï sesâiny kânâ. 20 Haba Adamu ame hwenyi ien âiân, me, Eva; anyin a e hinyen tavat ae möt hia thithö. 21 Ke haba Iehova Khong ame ânyâ li ükhaü a unen meno hobi kö Adamu me âiân, me okhav' ödrü.

22 Haba Iehova Khongame ha, ka habe, Wa bi, e ücü but at mötin, ame wâhmakhmeto so me kong; ke haba walang ang, wâ e nye hinöbeny me hom minya ünyi hnyi üö hnân melen, me han, me möt bi nyiele balua: 23 anyin a wale Iehova Khong ame obâ but e ünyi hnyi hnyeï Edena, me me belökâ kânâ waleji adre hia but hom e ünyi hnyin. 24 Waleling e ame obö Adamu but; ke e ame ip eiö hnyi hnyeï Edena ta je Kerubi, me hele vat ae ubâhlâ ame wiwia ka hnyi je ke keihen hnyeï hia, me hnân tuö gethen ka hnyi üö hnân melen.

London:
BRITISH AND
FOREIGN BIBLE SOCIETY.

1901